

ZESSEMUS SU LAMENTU

Sardos, zessemus custas cantilenas
de ingiustiscias e tortos patidos,
e prozedemus che frades unidos
pro truncare ligazzos e cadenas...

Ajò ch'est ora! Cambiemus vida
pro poder allevare attera prole,
chi da-e cràs ispuntat unu sole
de lughe giara in s'aèra pulida.

Zente sarda trascura su passadu
cando mancu in domo fis padrona...
Totu sas malefattas lis perdona
e siat dogni tortu ismentigadu.

Non t'aìres si tanta malasorte
in sos passados seculos has tentu;
ca non servin protesta nè lamentu
ma solu dignidade, e sias forte!

Sa fortuna a pagos est cunzessa
ca pro natura si mustrat ostile:
cun zertos unos est mama gentile,
cun atteros est bidriga revessa.

Non bintres in ripiccas odiosas
ca sun a dies nostras instantias,
e fruttu de mischinas balentias
chi giughen a iscenas luttuosas.

Cun bonu sensu sa rejone impitta
o restas in perenne discunfortu,
ca sos males chi causan su tortu
mai los hat curados sa venditta...

E che naschida a nou ti presenta,
no impastes cun lagrimas piùer...
Nè permittas plus de ti conducer
che pizinn'iscabadu a manu-tenta.

Solu fizos de tot'una bandela
senza campanilismos nè rancore;
sos Battor Moros cun su Tricolore
'umpare s'alzen in dogni carrela.

Siat custu vessillu bon'insigna
chi fine ponzat a dogni pelèa;
e tando in s'Unione Europea,
a fronte alta intres, o Sardigna.

Marcellinu

GIOVANNI SOGGIU
BONNANARO